

Alla tschertga da soluziuns

Savognin: sarada digl hotel Cube

DA GION NUTEGN STGIER / ANR

■ **Anfignen tgi la societad proprietaria digl hotel Cube e Savognin Pendicularas SA vignan betg da s'oneir restaro il menaschi saro. Chegl ins dastga deir siva dallas pi novas infurmaziuns pertutgont la sarada nunspitgeida digl hotel avant seis emdas.** Adegna puspe ins santiva tgi igl hotel Cube marscha betg propi, i mantgan igls giasts, las dretgas persungas tgi magnan igl travagl ed er tgi cun chellas acziuns da prietschs saptga igl hotel strousch star sur l'ava. La consequenza da tot chegl è alloura stada la sarada nunspitgeida digl hotel cun 270 letgs igl mez da settember. Igl 2005, cura tgi igl hotel Cube è nia surdo agl travagl ins è cartia a Savognin ed er ainten la val tgi graztga a chel flurescha igl turissem scu anc mai. Igl pi bler dus onns è igl hotel gia ena direcziun professionala e siva da l'ò è ple u manc angal ia angiu cuagl hotel Cube. Digl reminent an Austria èn igls treis hotels Cube gio saros pi dei.

Nign cor per Savognin

Da menziunar è tgi las persungas tgi èn alla testa dallas dus societads tgi on differenzas internas, stattan omens tgi on strousch cor per Savognin e per la regiun. Chegl èn *Rudolf Tucek* e dall'otra vart *Markus Schröcksnadel*. Aint igl center stattan igls affars ed oter ansomma navot. Chels funcziunan pero betg scu giavisch, uschia tgi tot igls oters èn la colpa angal betg igls agens travagls. Davart da Rudolf Tucek vign er anc fatg la ramprosch a Savognin Turissem da betg aver

fatg l'obligaziun chegl tgi pertotga la promozion da bike ainten la regiun. Agl cumegn Surses ranfatscha Rudolf Tucek d'aveir gia donns finanziels pervaia digl naufragi digl hotel agl Lai Barnagn. La realitad è pero tgi igl hotel Cube è dabet 300'000 francs agl cumegn Surses, per taxas, lubientschas, attatgs etc.

Egn ranfatscha sen l'otra

La raschung principala tgi igl hotel Cube è dad en de sen l'oter saro las sias portas è ena dispetta tranter igl proprietari digl hotel, Rudolf Tucek e Savognin Pendicularas SA. Construa è igl hotel nia sen taragn dallas pendicularas e persiva on chellas survagnia en pitschen dumber a aczias dalla societad acziunara digl hotel cun Rudolf Tucek alla testa. Da lez taimp, igl 2005 è nia fatg chel «deal», cun la cunvegna tgi igl prietsch per pernottar cumpeglia er igl prietsch per la carta digl de u dall'emda per eir cun skis. Chegl è schinavant funcziuno bagn, dantant igls davos onns damai betg ple scu giavischia. Savognin Pendicularas Sa pretendan tgi igl hotel Cube seia anc dabet 70'000 francs. Rudolf Tucek chel ranfatscha allas pendicularas d'aveir fatg paer igl hotel en mez milliun francs mengia bler per bigliets e cartas.

Va fatg igl mies pussebel

Daniel Fischer, igl president dalla Savognin Turissem Beiva Alvra SA ed er *Leo Thomann*, igl president communal da Surses, deploreschan fitg tgi è nia schinavant cuagl hotel Cube. I seia er nign bel mument da communitgier tgi chel resta saro aglmanc anfignen la stad 2019. Da-



Durant la staschung d'anviern tgi stat avant porta vign igl hotel Cube betg illumino cun esser saro.

FOTOS G. N. STGIER

niel Fischer menziuna d'aveir fatg tot igl sies pussebel per en inscunter communal tranter las persungas tgi èn involvadas ainten chella dispetta. Daniel Fischer deplorescha er tgi Rudolf Tucek è refuso da lascher manar igl anviern 2018/19 ena societad ancunashainta igl hotel Cube. La prioritad absoluta seia da catar bunas soluziuns per tots, tgi ins saptga puspe sa

discorrer ed alloura tgi igl hotel Cube derva puspe las sias protas, punctuescha Daniel Fischer.

Donn pigl image da Savognin

Daniel Fischer menziunescha tgi cun la sarada digl hotel Cube mantgan betg angal vers 16'000 pernottaziuns alla regiun, mabagn pitescha er igl image da Savo-

gnin. Ultra da chegl mantgan er passa 20 plazzas da lavour cun aver saro igl hotel Cube. El è er detg tgi Rudolf Tucek fess pront da vender igl hotel Cube, schinavant tgi dar interessents. Chegl tgi pertotga la situaziun finanziaria ed economica digl hotel e dalla societad saptga el deir navot, cun esser igl hotel en affar privat, è menziuno Daniel Fischer.

Ageid per sa gidar sasez

Brinzauls: preschentaziun digl Ageid Svizzer per la Muntogna

DA PEDER ANTONA BALTERMIA

■ **Sen iniziativa digl sviluppader dalla Regiun Alvra, Daniel Kunfermann è l'instituziun «Ageid Svizzer per la Muntogna» stada sen visita a Brinzauls. Igls responsabels on preschento pussebladads da sustign cun exaimpels concrets.** Igl «Ageid Svizzer per la Muntogna» è ena instituziun an furma da fundaziun. Cuntrari digl «Padrinadi svizzer per cumegns da muntogna» tgi sustigna cumegns geida igl «Ageid Svizzer per la Muntogna» a privats. El sa finanztescha angal antras donaziuns ed an nignas furmas cun daners da taglia. Atgnamaintg è ena angulivaziun da finanzas voluntaria digls cantuns urbans avers igls cantuns da muntogna. Igl onn passo ins è gia en record da donaziuns cun 31 milliuns. Igl cantun cun la pi gronda part ved chestas donaziuns è igl cantun Turitg.

Igl «Ageid Svizzer per la Muntogna» vign er sponsoriso. Per exaimpel antras la Mobiliar Svizra. Igl agent general per igl Grischun, *Valentin Spescha* è er sto preschaint a Brinzauls e declaro dad esser en partenari dall'instituziun e tgi ins vegia er interess da sustigneir projects ainten la Regiun Alvra.

Ageid per gidar sasez

Digl reminent: chest onn festivescha igl «Ageid Svizzer per la Muntogna» igl giubileum da 75 onns. L'instituziun è neida fundada alla fegn dalla sagonda ghera mundiala cura tgi igl basigns era grond. Manada vign ella d'ena vart dad consegl da fundaziun cun otg commembers. Tranter chels da nossa regiun Eveline Saupper da Savognin. Operativ dattigl ena direcziun cun la sia sedia a Turitg. En commember dalla direcziun è *Kurt Zraggen* tgi è declaro a Brinzauls scu tgi «Ageid Svizzer per la Muntogna» practi-

tgescha da gidar. Ins vegia la fegnameira da stgaffier posts da lavour e promover projects. Er projects turistics, pero adegna sen basa privata. L'instituziun sa vei sasez er scu partenari da finanziaun per travagls pitschens cun pi pac tgi 50 amplias.

Ins so tgi ainten las muntognas èn igls costs da produziun pi ots tgi ainten las aglomeraziuns, uschia ins viglia savens dar en sustign a travagls per tgi saptgan eir anavant sen atgnas tgommas.

Per tgi igl «Ageid Svizzer per la Muntogna» sustigna ensatgi finanziaimaintg dovrigl er tschertas cundiziuns. Igl affar,

travagl u l'interpresa stò esser ainten la zona III da muntogna. Scu chegl tgi Brinzauls è per exaimpel er. Alloura sto igl project pertutgier en purtader privat. Ed igl muteiv digl sustign è per solit tgi igls daners tanschan betg per eir anavant. Seia chegl per far las investiziuns basignevas per saveir exister e forsa er neir cun novs products.

Avant tgi vigna decidia per en sustign dad en project vigna intercurria quant daners tgi seian avant mang da vart privata. Alloura quant tgi ins survigna dalla banca. E sen fundamaint da chellas indicaziuns ins decida l'otezza digl sustign

antras igl «Ageid Svizzer per la Muntogna». Chel seia per regla tranter 10'000 ed 80'000 francs. Igls davos onns ins vegia sustignia total 560 projects aint igl Grischun. Mintg'on an somma dad 1,5 miu.

Vistas sen sustign vegian principalmaintg projects an connex cun l'agricultura, turissem, commers, forestalesser ed energia.

Dulzar la creaziun da valour

Raphael Jaquet è ena sagonda persunga tgi lavoura tar igl «Ageid Svizzer per la Muntogna» tar la direcziun. A Brinzauls

è el preschento exaimpels concrets digls davos onns tgi l'instituziun è sustignia ed on gido da rivar economicamaintg egn u er ples pass anavant. Savens sa tractigl da far midadas internas ainten en travagl pitschen per neir tar novas antradas. Magari è chegl cun exportar proudcts da qualitat er ordvart la regiun u alloura cun far la lavour tant scu pussebel ainten la regiun e cotras augmentar la creaziun da valour.

Raphael Jaquet è discurreia dad en legnamer ainten ena val talianga tgi vess lia ena maschina CNC (maschina cun computer) per igl sies travagl. Antras igl sustign digl «Ageid Svizzer per la Muntogna» è el nia da cumprar chel ed è savia agumentar la produziun e migliurar la qualitat ed ossa è el bel travagl tgi è fitg buna dumonda da lavour ed è er savia pleideir ulteriors legnamers.

En furner ainten ena val lucernes pistorst giud veia stava avant la dumonda da sarar igl sies affar tgi veva anc ena filiala ainten en li dasperas. Per far las modernizaziuns basignevas survagniva el betg igls meds finanziels basignevels. Graztga agl «Ageid Svizzer per la Muntogna» è el survagnia ena contribuziun, uschia tgi el è savia far las investiziuns. Oz è el 8-10 collaboratours ed è anc savia darveir ena terza filiala dasperas las dus existents. El so er piglier regularmaitg aprendists e chegl è gido ad el ed all'antiera regiun. Tar las contribuziuns digl «Ageid Svizzer per la Muntogna» sa tractigl da donaziuns «à fond perdu» tgi ins è betg da paer anavos.

Project da digitalisaziun seia er adegna puspe en tema.

La branscha turistica seia er adegna en camp tgi l'instituziun seia gidevla. Seia chegl an direcziun agroturissem u cun oters projects innovativs tgi geidan da migliurar las antradas dad en travagl.



Stos preschaints a Brinzauls: (da san.) Beat Ochse digl Ageid Svizzer per la Muntogna, Raphael Jaquet dalla direcziun, Eveline Saupper digl consegl da fundaziun, Daniel Kunfermann, sviluppader regional Regiun Alvra, Kurt Zraggen, direcziun e Walter Schmid.

PDS